



Terenga 4: Hōtaka 43 - He mea...e (rerehāngū)

He Mihi

Tēnā rā tātou i roto i te piringa tahitanga. E whai ana tātou i ngā tohutohu a Wharehuia i kī rā, me whakahoki i te reo mai i te mata o te pene ki te mata o te arero. Ki te riwha i a tātou tērā wawata, ka hōrapa te reo i ngā tōpito katoa o tēnei whenua. Mā hea mai i tēnā whāinga.

Hei Mahi Whakarongo

Nō Te Whanganui a Tara te kapa e haere ake nei. He rongonui te waiata nei i Aotearoa. Nā Kiri Te Kanawa hoki i rongonui ai te waiata nei i tāwāhi. Anei ngā pātai hei whakautu mā koutou:

1. He aha te kaupapa o te waiata?
2. He aha ngā wāhanga o te tinana i whakahuatia?
3. He aha ngā kupu hāngū o roto?

Kia whakarongo ake tātou ki Te Rōpū Tāhiwi.

He Whakamārama

E toru ngā momo rerehāngū. I rangona tētehi i roto i te waiata o te wāhanga tuatahi.

1. He rerenga ka tīmata ki te kupu hāngū. **Pākia** kia rite.
2. He rerehāngū ka tīmata ki te pūmahī. **I pākia** e rātou ō rātou ringa kia rite.
3. He rerehāngū ka tīmata ki te pū 'He'. **He mea** papaki e rātou ō rātou ringa.

I te momo rerenga tuatoru, ko 'He' te kupu whakataki i te rerenga. Ka whai mai ko te kupu 'mea', kātahi ka whai mai ko te kupu mahi, engari kāore ōna whiore. Ko 'e', ko 'nā' rānei ngā kupu hei whakataki i te kaimahi o tēnei rerenga. Kāore hoki he pūhono 'i', 'ki' rānei i mua i te aronga o te rerenga. Tirohia ngā tauira e whai ake nei:

He mea hari e Pita te pēke. = I haria e Pita te pēke.

He mea hari te pēke e Pita = I haria te pēke e Pita.

He mea tautoko **nā** Te Māngai Pāho. = I tautokona e Te Māngai Pāho.

Hei Mahi

Whakahāngūtia ngā rerenga e whai ake nei. Tīmatahia ngā rerenga ki ngā kupu, 'He mea'.

1. Nā Teremoana te kaupapa i kōkiri.
2. I whakatutukihia e ia ōna wawata.
3. I whāia e Rina te ākau roa.

Whakautu:

1. He mea kōkiri te kaupapa e Teremoana. / He mea kōkiri te kaupapa nā Teremoana.
2. He mea whakatutuki e ia ōna wawata.
3. He mea whai e Rina te ākau roa.